

Malaysia hanya miliki 29.6 peratus pekerja berkemahiran tinggi – PM

Malaysia memerlukan sekurang-kurangnya 45 peratus pekerja berkemahiran tinggi jika mahu bersaing dengan negara terkemuka dunia, kata Datuk Seri Ismail Sabri Yaakob.

- Ia mengikut data daripada **Jabatan Perangkaan Malaysia**.
- Malaysia perlukan sekurang-kurangnya 45 peratus pekerja berkemahiran tinggi jika mahu bersaing dengan negara terkemuka dunia.
- Negara perlu rancakkan ekosistem teknologi dan inovasi, bukan saja menerusi bekalan bakat berterusan, tetapi juga berusaha kurangkan 'brain drain' dalam kalangan bakat hebat tempatan.
- "Bagi merealisasikan hasrat ini, kerajaan komited sediakan infrastruktur terbaik memacu inovasi tempatan. Apa diperlukan sudah pasti sebuah lokasi sebagai hab inovasi dengan infrastruktur bersepadu." – Perdana Menteri, Datuk Seri Ismail Sabri Yaakob.

KUALA LUMPUR: Malaysia memerlukan sekurang-kurangnya 45 peratus pekerja berkemahiran tinggi jika mahu bersaing dengan negara terkemuka dunia, kata Datuk Seri Ismail Sabri Yaakob.

Perdana Menteri berkata, menurut **Jabatan Perangkaan Malaysia**, peratusan pekerja berkemahiran tinggi di Malaysia hanya mewakili 29.6 peratus saja.

Justeru, beliau berkata, amat penting untuk negara merancakkan semula ekosistem teknologi dan inovasi, bukan saja menerusi bekalan bakat yang berterusan, tetapi juga berusaha mengurangkan 'brain drain' dalam kalangan bakat hebat tempatan.

"Bagi merealisasikan hasrat ini, kerajaan komited menyediakan infrastruktur terbaik untuk memacu inovasi tempatan. Apa yang diperlukan sudah pasti sebuah lokasi sebagai hab inovasi dengan infrastruktur bersepadu.

"Ini bermakna negara memerlukan sebuah taman teknologi yang menjadi titik pertemuan pemegang taruh antaranya inovator, penyelidik dan pelabur bagi mengukuhkan ekosistem Sains, Teknologi dan Inovasi (STI), selain mampu menarik pelaburan langsung asing dan domestik bagi memacu ekonomi negara demi kesejahteraan Keluarga Malaysia," katanya berucap melancarkan Pelan Induk Taman MRANTI dan penjenamaan semula MIMOS Berhad kepada MIMOS Global di sini, hari ini.

Penjenamaan semula MIMOS Berhad kepada MIMOS Global bagi melambangkan imej baharu lebih meluas, bersesuaian dengan daya saing bidang teknologi yang tidak mengenal sempadan.

Turut hadir, Menteri Sains, Teknologi dan Inovasi, Datuk Seri Dr Adham Baba serta Menteri di Jabatan Perdana Menteri (Hal Ehwal Ekonomi), Datuk Seri Mustapa Mohamad.

<https://themerdekaitimes.com/news/2022/10/malaysia-hanya-miliki-29-6-peratus-pekerja-berkemahiran-tinggi-pm/>